

Tí xroon saoxín ikjin ch'ín Pablo chr'énen ch'án tí sín tinkáchónki Cristo siín chjasin Corinto

*Ch'ín Pablo mé ikjin ch'án xroon ichr'án ch'án tí
ninko chjasin Corinto*

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuit'ahä ch'án xrä. Janhan la ko kichó ni Sóstenes mé ² ikjinni tí xroon i chr'áhanráni tí jahará tójnkotsérá ninko chjasin Corinto. Ó kjuínchetjóará Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xíkaha kjueyá ch'án kaín xín tí sín tjanchehe sín ìnchéni Jesucristo kixin chrókjunkitsa ch'án sín, tíha mé Ìnché sín la ko Ìnchéni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjahará ch'án kjuaxróxin.

Ìnchéni Cristo mé tjencheayaon tí sín ntíha

⁴ Jnkochríxín tjánchähä Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xíkaha qantsí jína nohará chrónkaxínrá kixin nkexrí tinkachónkirá Ìnchéni la ko kjaxin qantsí jína tiénxinrá kaín nkehe

chaxín ntoá. ⁶ Tí nkehe kuínhínrá kíxin nkexrí tjen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuènte Nchákuén Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrā tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kíxin tsitoéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kíxin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kíxin Dios chaxín sinchexiteyá ch'án tí nkehe ntáchro ch'án kíxin jehe ch'án mé tsíkjeyará ch'án kíxin chrókuinkachónkirá tí Xjeen ch'án Jesucristo, mé Ìnchéni tíha.

*Jnkokoáhya kjuenkayáxin tí sín tinkáchónki Cristo
ntiha chjasin Corinto*

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kíxin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kíchuárá. ¹¹ Kichóni, ó kuinhán tí nkehe chrónka tí sín kjéhya ch'ín Cloé kíxin siín kjuanínkaon tí tjejorá tójnkotsérá ntiha. ¹² Na mé ntáxrjan kíxin isorá ntáchrórá kíxin jahará chréhérá tí janhan Pablo, la ko í sorá ntáchrórá kíxin jahará chréhérá tí ch'ín Apolos, la ko í sorá ntáchrórá kíxin jahará chréhérá tí ch'ín Pedro, la ko í sorá ntáchrórá kíxin chréhérá Cristo. ¹³ ¿Xá nkekjaín Cristo siín kíxin? ¿Á jehya jnkokoá Cristo tinkáchónkini? ¿Á janhan Pablo k'uényákonhánrás ní? ¿Á kuíkitexínrá tí njina ní? ¹⁴ Tjáncháhá Dios kjuasáya kíxin nijnko tí

jahará kuíkitiahyará ntiha. Jehó ch'ín Crispo la ko ch'ín Gayo mé kuíkite janhan. ¹⁵ Na mé nijnkorá xitjahya tsontáchrorá kíxin nina kuíkitexínrá. ¹⁶ Kjaxin jehó kuíkite tí ch'ín Estéfanas la ko tí sín kjéhya ch'án. Xráxinkákonyha á kuíkite í so sín o náhí. ¹⁷ Kíxin tí xra chjìna Cristo jehya kíxin chrókuíkite chojni. Náhí. Tí xra chjìna Inchéni kíxin tsoxrjankaxián tí tan tsaáxinni. Tjínkákonyha kíxin chrókjuákoxian palabra náxrjón noi kíxin xikaha chrókjuàkua ntá chrókjuintamá tí kjuachaxin jié kónoxín tí k'uénxin Inchéni Jesús tí ntacruz, kjuák'enkáni ch'án, k'uenyákonhenni ch'án.

Cristo mé tjakoxín tí kjuachaxién Dios la ko tjakoxín ch'án kíxin imá nohe Dios

¹⁸ Chronkaxínni kíxin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha exí nkehe chónkó. A ntá kaín ni chojni kuaáni mé t'ikonni kíxin kjuachaxin jié tíha. ¹⁹ Mé xikaha ntáchro xroon itén Dios tsíkjín sín ósé kíxin Dios mé sinchek'itjáyan tí nkehe tjenkayáxin tí sín imá nohe, la ko tsítqenta ch'án tí nkehe ntáchro tí sín imá tienxín sín.*

²⁰ ¿Mé nkehe tsónhen ntáchro sín kíxin imá nohe sín la ko nkehe tsónhen tjako sín la ko nkehe tsónhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kíxin lontí sín kíxin xikaha ichro sín. ²¹ Kíxin Dios qantsí nohe ntá xikaha kuítqehya ch'án kíxin kjuachaxin kuénte sín ó chrókjuacha sín chróchóxixín sín ch'án. Ntá kóxrjinhín Dios chrókjueyá ch'án chrókjuinchechaá ch'án tí sín

* **1:19** Isaías 29.14

kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkíva griego mé xritjeyá sín kíxin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoqxinni. Chrónkani kíxin ijkno ntacruz kjuák'enkáni ch'án, k'uénxin ch'án. A ntá tí sín judío ntáchro sín kíxin ijkno nkehe chrókósuhéheni chrókuinkáchónkini tíha, ichro sín. A ntá tí sín jehya judío ntáchro sín kíxin chojni lontí tí jeheni kíxin xíkaha tinkáchónkini, ichro sín. ²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kíxin Cristo mé k'uenyákonhenni ch'án. Mé xíkaha tjakoqxin Dios tí kjuachaxin jié la ko tí kjuaxrexinkaon jína kuénte ch'án. ²⁵ Ntá jehe sín ntáchro sín kíxin éxí ijkno nkehe chónkó tí nkehe kjuenkayáxin Dios, na kjónté xíkaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhë sín ch'án. La ko kjaxin ntáchro sín kíxin jiéhya tí kjuachaxin chóntha Dios. A ntá tí sín antsí má chóntha kjuachaxin ntihi chjasintajni kjónté la tóyóhëya sín Dios kíxin antsí chóntha ch'án kjuachaxin t'etoan ch'án. ²⁶ Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kjueyará Dios tí jahará. La ko tsjéhyará imá kuétoanrá la ko tsjéhyará k'uaxrjeníxinrá tí sín imá k'uék'etoan. ²⁷ Ntá kjónté Dios mé kjueyá iso tí sín noehya éxí t'ikon tí sín chjasintajni kíxin

xíkaha tjinkaon ch'án chrókjuinchesuèhé ch'án tí sín imá nohe ntihi chjasintajni. La ko kjaxin kjueyá Dios iso tí sín chóntahya kjuachaxin éxi t'ikon tí sín chjasintajni kíxin xíkaha tjinkaon ch'án chrókjuinchesuèhé ch'án tí sín imá chóntha kjuachaxin ntihi chjasintajni. ²⁸ Dios mé kjueyá ch'án iso tí sín t'etqanhyá la ko iso tí sín ninkehó sínkíhya tónhen sín ntihi chjasintajni kíxin jehe ch'án mé chrókjuinchek'itjáyan ch'án kjuachaxiéen tí sín jehó chrók'uetqan. ²⁹ Méxra xíkaha ninkexró tsjachahya sinchehnke tí tjen Dios. ³⁰ A ntá tí kjuachaxin kuénte Dios mé tinkachónkirá Cristo Jesús, a ntá chóntaxínni Cristo kjuaxrexinkaon jína, la ko tí kjuachaxin kuénte ch'án kóxíka tí jie kuénteni, la ko tí kjuachaxin kuénte ch'án sinchetjuáxinni ch'án, la ko tí ijníé ch'án k'uénaxínni ch'án. ³¹ Mé xíkaha éxi chrónka tí xroon tsíkjín sín ósé ntáchro kíxin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxín ch'án kíxin imá t'etqan tí kjuachaxin kuénte Dios."†

2

Ch'ín Pablo mé tjako ch'án kíxin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjáhará chrókjuákohará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. ² Kíxin tió k'uéjóni jnkokoá ntiha kjuenkayáxinhya janhan kíxin í so nkehe chrók'uitja chróxrjanka la jehó tjínkávan

† **1:31** Jeremías 9.23

chróxrjanka kíxin Jesucristo la kjuák'enkáni ch'án tí ntacruz. ³ K'uéjóni jnkokoá ntíha la ntá jahará ó nohará kíxin janhan kjuak'é éxí chrókjuachahya kíxin síxrànkana, chràkonna. ⁴ Tí kjuankíxian nixjáhará la ko xrjankaxián tí tan tsaáxin chojni, la tjínkakonhya chrókjuáchruàxínrá tí nkehe náxrjón nixja chojni tsíkonohe má. Náhí. Tió kjuákhárá kónoxín kíxin tjékian Nchakuen Dios la ko kónoxín tí kjuachaxin jié kuènte ch'án, ⁵ kíxin jehya kjuaxrexinkaon kuènte chojni tsíkonohe má chrókuinkachónkirá. Náhí. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixínni ch'án

⁶ Kjánchó tió tjákohä tí sín chaxín ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etoan chjasintajni, na mé tí kjuachaxin kuènte sín la tjoka ts'itjáyan. ⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxá k'ónahya chjasintajni kíxin nkexrí tsaáxinni. ⁸ Nijnko tí sín t'etoan chjasintajni kienxínya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuak'enkanihya sín Ìnchéni tjetoan tí ntacruz. ⁹ Éxí ntáchro xroon itén Dios tsíkjín sín ósé kíxin:
 Naxá k'uíkonhya chojni la ko naxá kíenhya chojni,
 la ko naxá kjuenkayáxinya chojni
 kíxin nkexrí siín kaín xín nkehe kjuich'éna Dios
 ts'ayéhé tí sín tjuéhe ch'án.*

* **2:9** Isaías 64.4

10 A ntá Dios mé nchenoexínni kaín tíha kíxin chóntani Nchakuen ch'án. Na mé tí Nchakuen Dios mé tjetsjehe kíxin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

11 Na mé ninkexró mé noehya nkexrí tjenkayáxin əsén chojni. Na mé jnkojnko chojni mé nohe kíxin nkexrí tónhen əsén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. **12** A ntá jehya tí nchakuen chojni chjasintajni k'uáyéheni. Náhí. Tí Nchakuen kuixín tí tjen Dios mé k'uáyéheni kíxin ntá tsongoexínni kíxin kaín xín nkehe kjuínchekitonhenni Dios. **13** Kjaxin jeheni chrónkani tíhi, a ntá jehya chronkaxínni tí nkehe tsíkonohe chojni ó. Náhí. Tí Nchakuen Dios mé nchenoexínni nkexrí tsjakqoexínni tí sín chóntha Nchakuen ch'án.

14 Kjánchó tí sín naxa chóntahya Nchakuen Dios mé xitjahya ts'áyéhé sín tí nkehe tjanjon Nchakuen Dios. Na mé éxí lóco t'ikon sín kaín tíha kíxin jehó tí sín chóntha Nchakuen Dios mé tsjacha sín tsienxín sín tíha. **15** A ntá tí nkexro chóntha Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jié tí jehe ch'án. **16** Méxra ntáchro xroon itén Dios kíxin: ¿Xá ninkexró chrókónohe kíxin nkexrí tjenkayáxin Inchéni kíxin chrókjuacha sín chrókjuqohé sín ch'án ínaá?† Kjánchó jeheni la ó chóntani tí kjuaxrexinkaon kuente Cristo.

† **2:16** Isaías 40.13

3

Tí sín jnkokoá kjuúch'ehe sín Dios xra

¹ Mé xíkaha, kichó ni, kjuachahya janhan chróníxjáhará éxí chojni t'etuñhen əsén sín Nchakuen Dios. Náhí. Éxí chojni naxa nchexiteyéhé sín tí nkehe ntáchro əsén sín, na mé éxí xjan ntsíntsí na ntá kjuankíxín kuinkáchónki Cristo mé xíkaha tí jahará. ² Janhan na kjuákoáxinrá nkehe xrähya éxí yóhë ijnko xjanhnte tí jahará naxa nchekakí ìné tsjen kíxín naxa xitjahya sine nkehe cha. Mé xíkaha tí jahará naxa xitjahya sinterá nkehe cha ³ kíxín naxa éxí chojni ó nchexiteyéhérá tí nkehe ntáchro əsánrá kíxín tí naxa siín kjuachjinoxínhin la ko siín kjuaníkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni. ⁴ Isorá ntáchrórá kíxín chréhérá tí janhan Pablo, la ko í sorá ntáchrórá kíxín chréhérá tí ch'ín Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuúch'ehe Dios xra, a ntá jahará kuinkachónkirá Închéni kíxín janhan kjuákohará. Jnkojnconi kjuúch'eni tí xra kjuanjon Închéni. ⁶ Janhan kuènka, a ntá ch'ín Apolos inta kjuáka ch'án, a ntá Dios la mé kjuínchek'ánkí ch'án tí nkehe a. ⁷ Méxra tí nkexro k'uënkaixin la ko tí nkexro tjáka ntá la kánhyó tjetoan kíxín Dios mé chónta kaín kjuachaxin la jehe ch'án nchek'ánkí kaín nkehe siín. ⁸ A ntá tí sín t'enka la ko tí sín tjáka ntá la ó jnkokoá ch'e sín xra, a ntá Dios mé tsjenkehe sín jnkojnko tí xra kjuúch'e sín. ⁹ Méxra jeheni mé jnkokoá ch'heni Dios xra, a ntá jahará

mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'eña ch'án. ¹⁰ Janhan mé tí maestro ch'eña nchia kíxin Dios kjuanjon kjuachaxin tsjaké tí xro xrankíxixín, a ntá í jnko nkexro sich'eña nchia chrítaón tí xro a. A ntá jnkojnko nkexro t'ichjánxín ntoá chrókjuch'eña sín nchia chrítaón tí xro a, ¹¹ kíxin kohya ninkexró tsjacha tsjak'e í jnko xro xrankíxixín tí nchia a kíxin táha la ó tsíkjin tsík'óna, kíxin Jesucristo tíha. ¹² A ntá chrítaón tíha mé tsjacha sich'eña chojni nchia tsík'óna chica oro, la ko chica plata, la ko xro náxrjón tjete, la ko inta tabla, la ko kaní, la ko ntaxro. ¹³ Na mé tsónoxín nkehe tí xra kjuich'e jnkojnko chojni tió tsi tí yaon tsjixixín. Kíxin tí yaon a mé tsi xrohi. A ntá tí xrohi mé tsjakoxín nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuich'eña ijkno nchia tsochehya la mé tsjacha ch'án tí xra kjuich'e ch'án. ¹⁵ A ntá tí chróche tí nchia kjuich'eña ijkno chojni, ntá chrók'uitjáyan kuenté. A ntá tí nkexro kjuich'eña nchia la tsaá éxí yóhe chrókuinkéhe ch'án xrohi.

¹⁶ ¿Á noahyará kíxin jahará kaín rá na mé ijkno ninkoe Dios la ko Nchäkuen Dios mé chóntha asánrá? ¹⁷ A ntá jnkojín nkexro tjinkaon ts'óxíka tí ninkoe Dios na mé Dios mé sinchek'itjáyan tí nkexro xikaha sich'e kíxin tí ninkoe Dios la tjoá tíha. A ntá tí ninko a mé jahará tíha.

¹⁸ Ninkexró chrókjuenkayáxin kíxin imá nohe. Tí jnkojínrá tónhen asánrá kíxin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kíxin

ntá chrók'uítjárá chrók'ónará ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontí t'ikon Dios. A ntá ntáchro tí xroon itén Dios tsíkjín sín ósé kíxin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”* ²⁰ La ko kjaxin ntáchro xroon itén Dios kíxin: “Inchéni la ó nohe ch'án kíxin kaín nkehe tjenkayáxin tí sín ntáchro sín kíxin imá nohe sín la mé ijnko kjuaxrexinkaon lontí tíha, ichro Dios.”† ²¹ Méxra chrókjuinchehnkehýará jahará kíxin chréhérá ijnko chojni imá nohe, kíxin kaín xín nkehe siín la kuéntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítonhen jie, la ko tí nkehe tsonhen chr'éxín, la kaín la kuéntará tí jahará. ²³ A ntá jahará la Cristo mé t'ayakonhanrá. Kíxin Cristo la jehe ch'án la mé kuénte Dios.

4

Tí xra kjuich'e tí sín kjueyá Ìnchéni

¹ Jahará chrók'uikonrá tí jeheni éxí chojni ch'ehó Cristo xra k'uáyéheni tí xra tjakoni tí nkehe kuénte Dios ninkexró k'uénoehya. ² A ntá ijnko chojni k'uáyéhe xra ts'etqan chrókjuakoxin kíxin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchrórá jahará chrókjuanchiará jie tí janhan kíxin tí xra t'ahq Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó

* ^{3:19} Job 5.13 † ^{3:20} Salmo 94.11

janhan tjenkayáxinhya kíxin chonta jie. Kjánchó jehya xíkaha tsontáxrjan kíxin Dios t'ikon kíxin chontahya jie janhan. Náhí. Jehe Ínchéni mé tsotsjehe ch'án nkehe tí jie chonta janhan. ⁵ Méxra naxaq kjuixrakáhya yaon chrókjuinchekeitqexínrá ichrén jie. Chonhénrá tí tsi Ínchéni kíxin jehe ch'án mé sinchenoxín ch'án kaín tí nkehe símá ti sítié, la ko sinchenoxín ch'án kaín xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kichóni, nixjahará tí nkehe i kíxin jína chrók'uejorá jahará ntá xíkaha kjuintayóaxian éxi ch'ín Apolos la ko éxi janhan kíxin chrók'uitjará kíxin chrókjuenkayáxinrá jehó tí nkehe tsíkjín sín ósé, kíxin nijnko nkexro chrókjuinchehnkehya kíxin chréhé sín ijnko chojni, a ntá tsochóntehya sín kjuasáyé tí jnko chojni. ⁷ ¿Méxra nkexro ntáchro kíxin jahará qantsí tjetoanrá? ¿Xá nkehe chontará naxaq kjuanjonhyá Dios kíxin? Tí kjuanjon Dios kaín nkehe chontará, ¿ntá nkekuénte nccheinkerá kíxin jahórá tsíkjeyárá tíha?

⁸ Juhará tónhanrá kíxin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxi ijnko rey, la í t'ichjánxianhyará ninkehó tí jeheni kíxin naxaq chrókjuinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'uetoanni.

⁹ Ntá tónhen asenná kíxin jeheni chojni kjueyá Ínchéni mé kjuanjon Dios kíxin jeheni chrókjuixixín chrók'uejóni éxi chojni kuítónhenni kíxin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni

tinkáchónkini Cristo, a ntá xíkaha t'ikon sín tí jeheni éxí chojni lont̄i. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté nax̄a jie jeheni t'enxínni kjinta, la ko t'enxínni nt̄a, la ko chóntahyani ikéni, la ko nínkakonhenni chojni, la ko chóntahyani nkerí ts'ejóni. ¹² La ko tóxrjéni kíxin itjani ch'exínni xra. A ntá tió t'ántaxính̄inni sín la tjancheheni Dios kíxin sincheyaon ch'án tí jehe sín. La ko tió chónkíhi sín tí jeheni la tónínkakuenhyani sín. ¹³ Tió t'ántaxính̄inni sín la jnkojína tjateheni tí jehe sín. T'ikon sín tí jeheni éxí chjinínó ntihi chjasintajni, na mé éxí ijnko nkehe ninkehó sínkíhya la ko mé xíkaha nax̄a sítónen tí yaon jie.

¹⁴ Ikjian tíhi na jehya kíxin chrókjuintasúàhará. Náhí. Tjínk̄avan chrókjuintaxráxinkáonrá kíxin éxí xjanna t'íkuan tí jahará, tjuahará. ¹⁵ Kjónté chróchontará ite mil chojni chrókjuakohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kíxin kjuákohará tí tan jína tsaáxinni. ¹⁶ Mé xíkaha xrijanóàhará kíxin chrókjuakoxinrá éxí tí janhan.

¹⁷ Méxra kuétuanhan tí ch'ín Timoteo kíxin tsjiji ch'án ntiha. Na mé éxí xjanna t'íkuan tí jehe ch'án, tjuah̄a ch'án, kíxin kjuákoh̄a ch'án ntá kuítekaon ch'án Ìnchéni ntá xráxín jína ch'e ch'án xra. Ntá tsjiji ch'án sintaxraxinkáonrá ch'án nkexrí tjákoxian tí nt̄je Cristo éxí xráxín tjákua kaín xín njinko t'atsínka tí janhan. ¹⁸ Ntá iso tí jahará imá ihnkerá kíxin tjenkayáxinrá

kixin chaxínhya chrókjuasántsjahárá. ¹⁹ A ntá tjoka chrókjuasántsjahárá tí chaxín xíkaha tjinkaon Ínchéni. A ntá jehya jehó tí nkehe nixja tí sín xriko kjuahnke mé chrókuinhán. Náhí. Na mé ts'íkuan á chaxín chóntha sín kjuachaxin kixin xíkaha nixja sín. ²⁰ A ntá tí kjuachaxién Dios la jehya tí nkehe tsonixjani ó. Náhí. Tí tjakoxinni la tí kjuachaxién Dios. ²¹ ¿Nkehe tjinkáonrá tí jahará, kixin á chrókjuasán chrókjuintakjasótiará? o ¿á tjinkáonrá kixin jnkójina chrókjuasán?

5

Tsitqexín ijnko jié tjachehe kichó chojni

¹ ¿Á chaxín tsík'ikon sín kixin tí tjejorá ntiha la ijkorá mé chontará nájoanrá éxí ichjiánrá? Tíha mé ijnko jié jié, la mé kjónté tí sín chónhya Dios la xikahya ch'e sín. ² A ntá kjónté xíkaha tsíkónhen la imá ihnkerá. Íchá jína imá chrók'uavárá. A ntá tí xíkaha ch'e ijnko chojni ntá chrókuétuēhnérá ch'án sáchrókjui ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxian la ntaha tjién éxí chrókjuak'é janhan, ntá t'akjénxian ihnjié Ínchéni Jesucristo la ntáxrjan kixin ó kjuixin kjuenkayáxian kixin nkekxi chrókjuasóte tí ch'ín xíkaha tsíkjich'e. ⁴ Tió tsojnkotsérá kaín rá ntiha la éxí koyá tsjak'é ntiha la kjánchó nchákuenná ó la ko koí tí kjuachaxién Ínchéni Jesús ts'ejókoará ntiha. ⁵ A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuénte ch'án. Ntá tió tsokjan Ínchéni mé tsaá asén ch'án.

6 Jahará chrókjuinchehnkehýará kíxin tí nkehe tsíkónhen ntiha. ¿Á noahyará nkehe ntáchro sín, kíxin tí ch'o a mé tjiko intsíkoá tí xroan ncheck'ánkí niotja, ntá kjónté la tsosán kaín tí ch'o? **7** Méxra chrókuakítsjerá ntója kaín tí xroan ntaxin ncheck'ánkí niotja, kíxin ntá jahará ts'ejorá éxí niotja tsík'óna ch'o nixin tsíkjkohya xroan ncheck'ánkí niotja. Éxí niotja ine sín tí yaon pascua, mé jahará tíha. Kíxin jehe Cristo, éxí ijnko kolélo t'óyán sín tí yaon pascua, mé k'uenyákonhenni ch'án. **8** A ntá chrókjuasinni tí kia a la kaín ̄sénni chróxraxinkaonni, tíha la éxí tí niotja chóntahya xroan ncheck'ánkíxín. La jehya kíxin chrókjuasinni tí kia naxa chróchóntani kjuaníkaon kíxin táha la yóhe tí xroan ntaxin ncheck'ánkí tí niotja a.

9 A ntá í jnko xroon chr'anhanrá k'uéntáxrjan kíxin ninkehó chrók'uítokyára tí sín tjasin jie chónta chojni chjin ókjé. **10** Ntá jehya kíxin kuétuanhanrá kíxin chrók'uítokyára tí sín chjasintajni tjasin jie chónta chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xíkaha chrókjuich'erá la t'ichjánxin chrók'uaxrjéxinrá tí chjasintajni. **11** Méxra ó kuétuanhanrá kíxin chrók'uítokyára ninkehó jnkojín chojni ntáchro sín kíxin kichó ni tí jehe sín, ntá naxa tjasin sín tí jie chónta sín chojni chjin ókjé, la ko tjinkaon sín jehó sín tsochóna sin itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xíkaha ch'e la chrókjón tekoahyará sín. **12** Jehya

xrana chrókjuintakitoaxián tí ijié tí sín jehya kuènte ninko ntiha. A ntá tí xra kuèntará jahará kíxin chrókjuinchekitoexínrá tí ijié tí sín kichó ni tójnkotsé ninko ntiha. ¹³ A ntá Dios mé sinchekitoexín ch'án ijié tí sín jehya kuènte ninko. Méxra, takítsjekjanxinra tí ch'ín jínahya kjuasin jié tí tjejorá ntiha.

6

Chrókjuikjanchahya sín jié nkayakon tí ch'ín juez tinkáchónkihya Ìnchéni

¹ A ntá jnkojínrá chrókjuánjonkoará kíchuárá chrókjuíkjanchahyará jié nkayakon tí ch'ín juez tinkáchónkihya Ìnchéni. Íchá jína chrókjuírá chróchenkará tí sín tinkáchónki Dios. ² ¿Á noahayará kíxin tí sín tinkáchónki Ìnchéni mé sinchekitoexín sín ijié kaín xín chojni chjasintajni? A ntá xíkaha sinchekitoexínrá ijié kaín xín chojni chjasintajni, ¿ntá nkekuènte tsjachahyará sinchekitoexínrá kjónté ijnko jié ntsí? ³ ¿Á noahayará jahará kíxin kjónté tí sín ángel tsotsjeheni nkehe tí xra kjuích'e sín? A ntá ijnko nkehe intsí ntihyó, la ¿á xitjahya chrókjuásiyóxinrá? ⁴ A ntá xíkaha chrókjuánjonkoará kíchuárá, ¿ntá nkekuènte tjíkjanchiará jié nkayakon tí sín tикиníxinha kuènte ninko? ⁵ Ntáxrjan xíkaha kíxin chrókjuintasuàhará. Xá kohya ninkexró kichó ni ntiha chóntha kjuaxrexinkaon jína tsjacha sincheyóxinhin ijié kichó ni? ⁶ Jahará jnkokqá kíchuárá ntá tjanjonrá, la ko kjaxin sátkjanchiará jié nkayakon tí ch'ín juez tinkáchónkihya Ìnchéni.

7 Kjónté ijnko jie ntsí ntá imá tjanjonkoáxinrá kíchuárá; tíha mé t'óna ijnko jie jié. Íchá jína chrókóninkákónhyará kíxin tí nkehe jínahya kjuít'ahará sín. Íchá jína chrókuítóhérá sín kjónté tsaáhará sín. **8** Kjánchó kjaxin jahará ntoáhya tjejoch'erá kíxin kjónté jnkokoá kíchuárá la teeherá sín.

9 ¿Á noahyará kíxin tí sín jínahya ch'e la ts'áyèhya sín kjuachaxin kuènte Dios? Chrókuítóéhyará chrókjuit'áyahará sín, chrókónohará kíxin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachéhé kichó sín, la ko tí chojni t'o chjin, t'o ntoa, la ko tí sín jnkokón ntoa sín tóxrjínhin kichó sín, **10** la ko tí xíchée, la ko tí sín tjinkaon sín jehó sín tsochónta sín itsjé nkehe, la ko tí sín tókoan, la ko tí sín ch'eña kjuach'ia, la ko tí sín ixri ch'ia sín kíxin tsjacha sín chichaon, na mé ts'áyèhya sín kjuachaxin kuènte Dios. **11** Xikaha k'uéjórá isorá senó. Ntá jie ó k'uíjmárá, kjuíncchetjóárá Dios, ntá ó xíka ijiárá kjuachaxin ihnié Inchéni Jesucristo la ko kjuachaxin kuènte Nchäkuen Dios.

Tí cuerpo ó tsíkótjóá

12 Siín kjuachaxin kaín nkehe chrókjuit'a, kjánchó iso nkehe la ó chónkó. Siín kjuachaxin kaín nkehe chrókjuit'a, kjánchó chrókuítóahya ninkehó nkehe chrók'uetuqanna. **13** Chaxín tí nkehe ntáchro sín kíxin ó k'óna tí nkehe sineni kíxin tséeni ó sátsji, la ko ó tsík'óna tséeni kíxin ts'inka nkehe sineni. Kjánchó Dios mé sinchek'itjáyan yói tíha. A ntá k'ónahya tí cuerpo kuènteni kíxin chrókjusixínni jie. Náhí. Tí cuerpo kuènteni mé

k'óna kíxin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. ¹⁴ Méxrə Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kíxin jnkojnko cuerpo kuèntará mé it'qo tí cuerpo kuènte Cristo? ¿Á chrókjuít'a janhan kíxin it'qo tí cuerpo kuènte Cristo chrók'óna it'qo cuerpo kuènte ijkno chojni chjin ch'iyehe nchónhya chojni ntoa? Méxrə kjá náhí. ¹⁶ ¿Á noahyará kíxin tió ijkno chojni ntoa chrókuakja ijkno chojni chjin chóntha nchónhya chojni ntoa, ntá tí jehe sín yói sín chrók'óna sín jnkokoá cuerpo? Kíxin ntáchro xroon itén Dios kíxin: "Yói sín la ts'óna sín jnkokoá chojni."* ¹⁷ A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxrə chrókuitohérá chróchontahyará chojni chjin ókjé. Tí í so jiē tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jiē chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kíxin jnkojnko cuerpo kuèntará mé éxí ijkno níinko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya ìnché tí cuerpo kuèntará ²⁰ kíxin jahará la tjete k'uénaxínrá Dios. Méxrə chjeéxinrá kjuasáyé Dios tí cuerpo kuèntará la ko tí nchakónrá kíxin yói la kuènte Dios.

7

* **6:16** Génesis 2.24

Chenka ch'án tí sín tsíkótéhe kíxin nkexrí chrók'uejó sín

¹ A ntá jie tsjataḥa tí nkehe tsíkjinrá kjuan-chankinárá, na mé ntáxrjan kíxin chaxín chrókójína kíxin tí chojni ntoa chrókuakjahya ichjién. ² Kjánchó tí xíkaha imá tjinkaon sín tsochónta sín itsjé chojni chjin tsjasinko sín jie, la íchá jína jnkojnko chojni ntoa chróchónta jnkojnko ichjién kuènte la ko jnkojnko chojni chjin chróchónta jnkojnko xìi kuènte. ³ Tí chojni ntoa la ko tí chojni chjin chrókjuinchexiteyéhé sín kíchó sín. ⁴ Tí chojni chjin jehya ìnché tí cuerpo kuènte tjan, na mé kuènte xìi tjan. Ntá kjaxin xíkaha tí chojni ntoa la jehya ìnché tí cuerpo kuènte ch'án, na mé kuènte ichjién ch'án. ⁵ Chrókjuincheniéhyará kíchuárá, jehí jnkokoá chrókjuenkayáxinrá yóírá kíxin tsochonteherá iso yaon kíxin ntá kaín əsánrá chrónixjehérá Dios. Ntá tsjixin ntá chrókóchjineherá kíchuárá ínaá kíxin chrókuijtoéhyará kíxin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kíxin tsqonohará kíxin siín kjuachaxin xíkaha na kjánchó jehya kíxin xíkaha tétuñhanrá. ⁷ A ntá janhan ntáxrjan kíxin chrókójína kíxin kaín rá chojni ntoará chrókoyóhárá éxí tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxa tóteehya la ko tí chojni tsíkók'án na ntátjan sín kíxin chrókójína kíxin xíkahó chrók'uejó sín chrókótéehya sín éxí tí janhan xíkaha. ⁹ Kjánchó tí chrókjuachahya sín tí tjak'e əsén kíchó sín, naxa chrókjuasin sín jie, ntá íchá jína

chrókótéhe sín kíxin jehya jína kíxin jnkochríxín chrókjuak'ó əsén sín.

10 A ntá jahará ó tsíkjixin tsíkótahará, la tétuənhanrá tíhi: a ntá jehya kíxin kjuachaxin kuèntəna tétoanxínrá. Náhí. Kjuachaxin kuènte Închéni mé tétoanxínrá kíxin tí chojni chjin chrókjuákehya xìi. **11** A ntá tí chrókjuákehé ijnko chojni chjin tí xìi, ntá xíkahó chrókuitohe tjan jehó tjan la ko chrókójína chrókoyóxin, chrókjuülinhin tí kjuanínkaon kíxin tí kjuákehé kichó sín. Kjaxin xíkahá tí chojni ntoa la chrókjuákehya tí ichjién.

12 A ntá tí nkehe tétuənhan tí í so sín jaí la kuèntəna janhvàn, jehya kuènte Închéni, kíxin tí tjen ijnko ch'ín kichó ni chóntha ch'án ichjién ch'án tinkáchónkihya Închéni, na kjónté naxaq tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. **13** La ko tí tjen ijnko tjan kichó ni chóntha xìi tjan tinkáchónkihya Închéni, ntá kjónté naxaq tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. **14** Kíxin tí xìi tjan tinkáchónkihya Închéni ntá jie ó kótjóá ch'án kíxin tí ichjién mé tinkáchónki Dios, la ko tí ijnko tjan tinkáchónkihya Închéni ntá jie ó kótjóá tjan kíxin tí xìi tjan mé tinkáchónki Dios. A ntá tí xíkahya, la tí xjeen sín chrókótjuáhya, na ntá jie la mé ó kótjóá tí xjeen sín. **15** A ntá tí ch'ín ntoa o tí tjachjin tinkáchónkihya Închéni tjinkaon chrókjuákehé kichó sín, la ája nohe sín tjákéhē kichó sín, kíxin Dios tjinkaon kíxin kjuaxróxin chrók'uejorá. **16** Jahará chojni chjinrás, ənkexrí chrókónohará kíxin nkexrí

chrókuaá xiará? La ko jahará chojni ntoará, ¿nkexrí chrókónohará kíxin nkexrí chrókuaá ichjiánrá?

17 A ntá jnkojnkо chojni chrók'uejó sín éxi tsíkjanjon Inchéni kjuachaxin tsík'áyéhe sín, la ko éxi tí k'uéjó sín tió k'uíyéhe sín Dios, kjánchó chrókuítøehya sín tí jehé ch'án. Mé xikaha tétuñhan kaín tí ninko. **18** Tí chrók'uíyéhe Dios ijkno ch'ín chóntha xroye, ntá xikahó chrókuitohe ch'án. A ntá tí chrók'uíyéhe Dios ijkno ch'ín chóntahya tí xroye a, ntá kjónté chrókuahya ch'án tí xroye a. **19** Na mé tjetuanhya á chóntha chojni tí xroye o á chóntahya chojni tí xroye. Na mé tí nkehe tjetoan kíxin chrókjuinchexiteyéhení tí nkehe k'uëtoan Dios. **20** Chrók'uejóni jnkojnkoní éxi k'uéjóni tí k'uíyéhení Dios. **21** A ntá tió Dios k'uíyaha jaha, kjónté jaha ijkno chojni ch'exón xra, ntá chrókoxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuákjá tíha. **22** Kíxin tí nkexro kjuich'exón xra tió k'uíyéhe Inchéni kíxin tsinkáchónki ch'án, la mé jie chóntha ch'án tí kjuachaxin tjanjon Inchéni. Kjaxin tí nkexro k'uítuenhya tió k'uíyéhe Inchéni la mé jie mé ch'ehe ch'án xra Cristo. **23** Dios imá tjete k'uénaxín ch'án tí jahará. Méxra chrókjuánjonhyará kjuachaxin kíxin ókjé chojni chrók'óna ñinchárá. **24** Méxra kichó ni, éxi k'uejorá tió k'uíyahará Dios kíxin tsinkachónkirá ch'án, la xikahó naxa chrók'uejorá jie kíxin chontará Inchéni tsjinkitsa.

25 A ntá tí chojni naxa tótøehya sin na mé janhan chontahya nkehe kuènte Inchéni chrókuétuñhan sín. Kjánchó tsøxrjanka tí nkehe tjenkayáxian

janhvà̄n, a ntá chrókuítekáonrá tí janhan kíxin kuíkonó̄na Închéni. ²⁶ Mé xíkaha tòンna kíxin chrókójina kíxin jnkojnkо chojni chrókuitohe sín éxí tjejó sín chrókóteehya sín, kíxin ijie la kjuaxróxinhya tjejóni. ²⁷ A ntá tí chontará ichjiánrá ntá chrókuakééhyará tjan. A ntá tí chontahyará ichjiánrá ntá íchá jína chrókjuéyáhyará. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjáxin jehya jie. A ntá tí sín tsíkótehe la tsochónta sín kjuaxikaon, mé xíkaha janhan chrókjuínk̄tsa sín kíxin chróchóntahya sín kjuaxikaon.

²⁹ Mé xíkaha tjétjønkará kíchó ni kíxin tsjéhya yaon naxa t'itjáyan tsokjan Închéni. Mé xíkaha tí chojni ntoa chóntha ichjién sín, la antsí tjetooan saoxín chróxraxinkaon sín Închéni, la ntá chr'éxín chrótjuèhe sín ichjién sín. ³⁰ A ntá tí sín tsjánka la chrók'uejó sín éxí chrótsjánkahya sín. La ko tí sín chéhé la chrók'uejó sín éxí chèhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín. ³¹ La ko tí sín kjuacha nkehe siín chjasintajni la chrók'uejó sín éxí ninkehó chróchóntahya sín, kíxin kaín nkehe t'ikonni chjasintajni ntihi mé tjoka tsjē.

³² Tjinkakonhya kíxin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xr̄a kuèente Închéni chrókjuinchexiteyéhe ch'án tí nkehe tóxrjinh̄in Închéni. ³³ A ntá tí ch'ín tsíkótehe antsí tóxakonhen tí nkehe siín chjasintajni kíxin xíkaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kíxin tí tjan tsíkóteehya la antsí má tóxakonhen tjan

tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí əsén tjan. A ntá tí tjan tsíkótēhe mé tóxakonhen tjan tí nkehe siín chjasintajni kixin xikaha sinchechéhe tjan xìi tjan.

³⁵ Tjétjonkará tíhi kixin tjinkaván kixin jína chrók'uejorá, jehya kixin xikaha chrókuétuanhanrá. Náhí. Tjinkaván kixin kjuasáya chrók'uejorá jnkójína la jehó Ìnchéni chrókjüich'eherá xra.

³⁶ A ntá jnkójínrá tjenkayáxinrá kixin chrókójína chrókótēhe ijkó xjaanrá chjin kixin ó tsícha tjan, la ntá tí xikaha la ó nchoxon tsotēhe tjan na mé jehya jie. ³⁷ A ntá jnkójínrá tjinkáonrá kaín əsánrá kixin chrókótēhya xjaanrá chjin la kjaxin tjan xikaha tjenkayáxin tjan la əntsí jína tíha. ³⁸ Mé xikaha tí títohérá xjaanrá chjin kixin tsotēhe tjan la ó nchoxon. La ko kjaxin tí tjinkakonhyá tjan kixin chrókótēhe tjan na mé əntsí jína tíha.

³⁹ Tí tjan tsíkótēhe mé k'uítuenxín tjan kjuachaxin tí ley kixin tsjak'eko tjan tí xìi tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsotēhe tjan ínaá tí nkexro tsqxrjinhín tjan, kjánchó jehó ijkó nkexro tinkáchónki Ìnchéni mé chrókótēhe tjan. ⁴⁰ Kjánchó əntsí chrókóchéhe tjan tí jehó tjan chrókuitóhe tjan, tí í chrókótēhya tjan. Méxra xikaha tjenkayáxian janhan la ko kjaxin tòonna janhan kixin chonta janhan tí kjuachaxin kuènte Nchäkuen Dios.

8

Tí nkehe ine sín tjokehé sín tí nkehe tsíkjangya

¹ A ntá jie tsoxrjanka kuènte ti ko its'en tjokehé sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kíxin tí chrók'uitjani má ntá chrókóhnkeni má. Antsí tjetoan chrótjuèheni kíchó ni kíxin xíkaha qantsí chrókuinkáchónkini Ìnchéni. ² Tí jnkojín nkexro ntáchro kíxin nohe ch'án, na mé chaxínya tíha la naxq t'itjáyan tí nkehe chrókónohe ch'án. ³ A ntá jnkojín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehé sín tí nkehe tsíkjanoya, la ó noheni jína kíxin tí nkehe tsíkjanoya la t'etuñhya ninkehó ntihi chjasintajni, la ko ó noheni kíxin jnkokoá Dios tjen. ⁵ A ntá siín nkehe ncheck'in sín díos nkaya nkajní la ko chjasintajni na, kjánchó tí xíkaha la kjá chrók'uixin itsjé díos la ko itsjé ìnché sín. ⁶ A ntá jeheni chóntani jnkokoá Dios na mé It'eni tíha, la jehe ch'án mé kjuich'éna ch'án kaín xín nkehe la ko tjejóni kíxin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe siín la kjuich'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènhen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehé chojni tí nkehe tsíkjanoya na mé tjenkayáxin sín kíxin ó tsík'ayéhe ijkno dios, kíxin naxq noehya sín má, ntá ntáchro sín kíxin ó kuámá sín tí jie kuènte tí nkehe tsíkjanoya. ⁸ Ó noheni chaxín kíxin jehya kíxin chrókóxrjínhin Dios tí jeheni kíxin tí nkehe jína chrókjóneni. Náhí. Jehya kíxin

chrók'uejoxinni jína kíxin tí nkehe chrókjóneni na ko tí nkehe chrókjónehyani. ⁹ Méxra títqéhyará kíxin tí kjuachaxin chontará sinterá kaín xín nkehe mé xíkaha chrókjuchroe ijnko chojni kichó ni naxaq noehya jína tinkáchónki Ínchéni ntá tíha chrókjusixín sín jie. ¹⁰ A ntá tí chrók'uikon sín kíxin jahará ó nohará jína ntá ts'ejorá sinterá nkehe nkaxenhen ijnko ninkoe nkehe tsíkjanoja, ntá tí chojni kichó ni naxaq noehya jína ntá chrók'uikon sín xíkaha ntá kjaxin jehe sín tsotjinkaon sín sine sín tí nkehe tsíkjokehé chojni ijnko dios chaxínya. ¹¹ A ntá jahará ó nohará jína ntá xíkaha tjejoch'erá itsará sinchek'itjáyanrá tí kichó ni naxaq noehya jína tinkáchónki Ínchéni kíxin Cristo k'uenyákonhen tí jehe ch'án kjaxin. ¹² Méxra tí xíkaha chrókjuch'erá la chrókjusinhínrá jie tí sín kichó ni naxaq tinkáchónkihya sín Ínchéni jína, na mé xíkaha kjaxin chrókjusinhínrá jie chrókuitekákuenhýará Cristo. ¹³ Méxra tí xíkaha chrókjusixín jie ijnko kichó ni kíxin tí nkehe chrókjóneni, ntá íchá jína chrókjónehyani nto ínaá kíxin xíkahya ntá chrókjuchroexín tí sín kichó ni ntá chrókjusixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kíxin janhan la chonta kjuachaxin kíxin ijnko apóstol tsíkjeyá Ínchéni kíxin janhan k'uíkuan ch'án. Jähará mé tjáköxínrá tí xra kjuít'a kuente Ínchéni. ² Iso sín ntáchro sín kíxin tjátsoanhýana sín kíxin

ijnko apóstol tsíkjeyá Ìnchéni. Ntá jahará kaín rá mé chrókjuaútsoanrá tí janhan kíxin tí kuítekáonrá kuinkachónkirá Ìnchéni mé xíkaha tjákoxinrá kíxin chaxín janhan tsíkjeyána ch'án.

³ Méxra janhan jína chrókjuaútahá tí sín xritjontana, chróntáxrjan kíxin: ⁴ Janhan chonta kaín kjuachaxin chrók'uayáhá nkehe chrókjonè la ko chrók'ui. ⁵ Kjáxin chonta kjuachaxin chróchonta ijkno chojni chjin tinkáchónki Ìnchéni chrók'uajikian éxí chónta tí í so sín tsíkjeyá Ìnchéni, la ko tí sín kichó Ìnchéni, la ko éxí chónta ch'ín Pedro. ⁶ ¿Á tjenkayáxinrá kíxin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani? ⁷ ¿Nkexro ch'e xra soldado ntá chichákqen ch'án ó chrókuicháxinhin? Nkexro k'uenká nta to uva ntá kjónehyá ch'án to? ¿La ko nkexro t'ayakonhen kolélo ntá k'uíhya tí tsjen t'énen sín va? ⁸ Ntáchrohyará kíxin janhvàñ kjuenkayáxian tíha kíxin kjáxin xroon tsíkjin ch'ín Moisés xíkaha nixja. ⁹ Méxra kjáxin ntáchro tí xroon tsíkjin ch'ín Moisés ósé kíxin: "Chrókjuejóyahyará kampoxa ir'va koxinta tí tsinkátja va noatrido tió tsónkéhe sín noa."* Tíha mé t'axrjexín kíxin jehya koxinta ó tóxakonhen Dios. ¹⁰ Náhí. Tóxakonhen ch'án kíxin tí jeheni. Méxra xíkaha nixja tí xroon kíxin chrók'uejoxinni jína. A ntá tí nkexro kjuínchentá nche la ko tí nkexro tsónkéhe noa, yói sín la chróchónhen sín chrók'uayéhe sín tí nkehe k'óna. ¹¹ A ntá tí k'uénkāni tí itén Dios əsánrá, la kjá chróchóntani kjuachaxin chrókjuañchaharáni ichréñ nkehe

* **9:9** Deuteronomio 25.4

t'ichjánxinhinni. ¹² A ntá tí xíkaha í so sín chóntha sín tí kjuachaxin tjanchia sín nkehe ts'áyéhé sín, ntá jeheni antsí má chóntani kjuachaxin chrók'uáyéheni nkehe.

Kjónté chóntani kjuachaxin xíkaha la kjuanchahyani nkehe, kjónté kánhyó náxrjón k'uéjóni kíxin tjinkakonhyani chrókjuanchiani nkehe chrók'uichjánxinhinni kíxin ách'e xíkaha ntá chrók'uinkákonhen tí itén Cristo chrókjuakoni. ¹³ Jahará ó nohará kíxin tí sín ch'e xrä kùente ninko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntøe tí ko t'óyánxin sín ntiha. ¹⁴ Méxrä xíkaha kjaxin k'uetoan Inchéni kíxin tí sín ch'e tí xrä ó chrónka sín tí tan tsaáxinni na mé tí xrä a chrók'uaxrjeníxín tí nkehe chrókjóne sín. ¹⁵ Kjónté janhan siín kjuachaxin xíkaha chrókjuit'a, la xíkahya kjuít'a la ko kjaxin xíkahya ikjian tí xroon i kíxin jahará chróchjınará ichréñ nkehe. Náhí. Kjónté chrók'uénxiän kjinta chrókjuáncháhyará nkehe kíxin tjínkakonhyá kíxin ninkexró chrókuakitsjena tí kjuachéhé chonta.

¹⁶ Jehya kíxin chrokjuintahnke chrókjuàkua tí tan tsaáxinni. Náhí. Janhan na ó jehí sit'a tí xrä a. Nòa tí janhan tí chrókjuákohya tí tan jína chrókuaáxin chojni. ¹⁷ A ntá tí janhván tjínkaván chrókjuàkua la xíkahó chrókjuacha janhan. A ntá tí tjàkua itén Dios kíxin xíkaha kuítuanna ntá xíkahó ntaxiteyá tí xrä chjìna Dios. ¹⁸ ¿A ntá nkehe chrókjuacha janhan? Tíha mé chrókjuacha janhan kíxin chrókochàna má kíxin chrókjuàkua tí itan tsaáxinni la ninkehó chrókjuánchàhya chrókjuacha

la ntá tí xíkaha la chrókuákjaáhya tí kjuachaxin tí chrókuàkua.

¹⁹ Méxra kohya nkexro t'etuanna. Kjánchó ó jehí chrókuít'ahq kaín xín chojni xrä kíxin xíkaha qantsí tsjé chojni chrókuacha janhan kíxin chrókuitekaon sín Cristo. ²⁰ Ti tjèn tí sín tí sín judío ntayóhá éxi jehe sín xíkaha janhan kíxin xíkaha chrókuacha jnkójín sín chrókuitekaon sín. Na mé t'axrjexín kíxin tí chrókuacha iso ti sín nchexiteyéhē tí ley k'uetoan ch'ín Moisés, la t'ichjánxín kíxin kjaxin janhan chrókuintaxiteyá tí ley kjónté janhan la xíkahya t'etuanna tí ley. ²¹ A ntá tí chrókuacha jnkójín tí sín nchexiteyéhya tí nkehe k'uetoan ch'ín Moisés la ntayóhá éxi tí jehe sín xíkaha janhan kjaxin, kjónté chaxin t'etuanna tí nkehe k'uetoan Dios méxra ntaxiteyá tí nkehe k'uetoan Cristo. ²² Tió tjèn tí siín tí sín tienxínhyá jína, ntá kjaxin janhan t'óna éxi tí jehe sín kíxin xíkaha chrókuacha jnkójín tí jehe sín chrókuitekaon sín. Méxra ntayóhá éxi kaín xín chojni xíkaha janhan kíxin xíkaha chrókuacha janhan kíxin chrókuáá iso tí jehe sín. ²³ Mé xíkaha kaín tíha tjét'q kíxin chrókuinhin sín tí tan chrókuáxin sín la ko kjaxinna qantsí má chrókuintayaonna Dios.

²⁴ Jahará ó nohará kíxin tió itsjé sín tsinkáko kíchó sín la kjánchó ójnkó nkexro tsjacha tí tsitonhen nkehe. A ntá jahará xíkaha chrókuinkará kíxin chrók'uayéhérá tí nkehe chrókuitonhanrá. ²⁵ Tí sín tinkáko kíchó sín na mé jína t'ayakonhen sín əsén sín, titóhe sín kaín xín nkehe chrókuich'ehe sín daño kíxin tjinkaon sín chrókuacha sín, chrók'uayéhē sín kjónté ijkno corona tsík'óna kayoa ó tjoka tsoxámá. Kjánchó jeheni ch'eni

xra_q kuènte Ìnchéni kíxin ntá ts'áyéh_{en}i ijnko nkehe chónhya ts_{ox}ámá. ²⁶ A ntá janhan jehya éxí ijnko chojni t'ikonhya chrókuinka. Jehya éxí xr_{int}o ó chrókuánjonkian. ²⁷ Náhí. Janhan tjánjonkian tí cuerpo kuént_ana, tétuanh_{an} kíxin jína chrókuincheiteyàna kíxin tóxakonna kíxin chrókuásian ichréñ jié ntá janhan chrókuachahya kjónté senó kjuák_{oh}a itsjé chojni.

10

Tí nkehe t'_{et}oan ch'án kuènte tí nkehe tsíkjanoya

¹ Tjínk_avan janhan kíxin chrókónohará kíchó ni kíxin tí sín k'uaxrjeníxinni ósé, kaín sín k'uíxinkánkí sín chrínkí tí tju_i, la ko kaín sín k'uátòye sín Ntayaon Kjátse, ² la ko kaín sín k'uéchréh_e sín ch'ín Moisés éxí yóh_e chrókuikite sín kíxin jnkokoá k'uéjó sín tí tjen tí tju_i la ko tí ntayaon la ko kjuínchexiteyéh_e sín ch'án kíxin jehe ch'án k'uék'_{et}oan ch'án. ³ La ko kaín sín kjóne sín jnkokón nkehe kuijin nkaya nkajní ⁴ la ko kaín sín ik'ui sín jnkokón nkehe kjuanjon Dios kíxin ik'ui sín nt_a k'uaxrjexín ijnko tjo kjuíncheyaon Dios, na mé tí tjo a la mé t'axrjexín kíxin Cristo tíha. ⁵ Kjánchó itsjé tí jehe sín kjuínchechéhya sín Dios, méxra kóninkaon ch'án la tí nteje ó k'uénxin tí sín a.

⁶ Kaínxín tíha kónhen kíxin chróxraxinkakonxínni jeheni, chróntáchrohya asénni chrókjuich'eni tí nkehe jínahya éxí kjuích'e tí jehe sín. ⁷ Méxra chrókuinkachónkihyará jahará nkehe tsíkjanoya éxí k'uékinkáchónki iso tí jehe sín, éxí ntáchro tí xroon itén Dios tsíkjín sín ósé kíxin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen

sín la ité sín".* **8** Méxra chrókuasinkohyani jie chojni chjin ókjé éxí kjuich'e iso jehe sín ntá ik'uén sín, ventitres mil sín, jnkokoá yaon.† **9** Kjaxin chrókjuinchekóninkakonhyani Ínchéni éxí kjuich'e sín ntá ik'uén sín kíxin kjónehe sín konche,‡ **10** la ko chrók'uántaxíenhyani Dios éxí k'uántaxínhin tí jehe sín ntá tí ángel kuènte kjuach'en mé kui k'óyán sín.§

11 Kaín tíha kónhen tí sín k'uaxrjeníxinni ósé kíxin chrókónoexínni la ko k'óna xroon chrónka xikaha kíxin nchexraxinkaonni tí jeheni tjejóni jie kíxin í séhya tsjixixín tsjeje chjasintajni. **12** A ntá tí nkexro ntáchro kíxin ntoá tjen na chrókoxakonhen kíxin chrókjuichroehya. **13** Jahará naxq k'uatsínhayará ninkehó nkehe tí chrókjuachahya chojni chrókónhen. Méxra jahará chróxráxinkáonrá Dios kíxin jehe ch'án chrókuítgehya ch'án tí jahará kíxin chrók'uatsínhará nkehe imá xra chrókjuachahyará. Méxra tí itsi ichréñ nkehe tsonhanrá la Dios tsjinkitsará ch'án kíxin chrókjuachará chrók'uatsínhará tí nkehe chrókónhanrá.

14 Méxra tjuahará jahará kíchó ni, la ntá ntáxrjan kíxin chrókuítgehérá tí nkehe tsíkjanoya. **15** Nixjahará jahará kíxin jahará chojni ó tienxín. Méxra jahórá chrokjuenkayáxirá kíxin á jína tí nkehe ntáxrjan. **16** Tí tjanchiani kjuasáya kíxin tí nkehe it'ini na mé kaín ni jnkokoá tjakoxínni tí ijnié Cristo ó k'uítji. La ko tió tóchrít'oni tí niotja ineni, na mé kaín ni jnkokoá tjakoxínni tí cuerpo

* **10:7** Éxodo 32.6 † **10:8** Números 25.6–9 ‡ **10:9** Números 21.5–6 § **10:10** Números 16.41–49

kuènte Cristo. ¹⁷ Kjónté nchónhyani jeheni la kaín ni na jnkokoá niotja ineni kíxin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israél, na mé ine sín tí ko tsíkjokehé sín Dios ntá xikaha tjakoxín sín kíxin xikaha tinkáchónki sín. ¹⁹ Ntáxrjanhya kíxin tí nkehe tsíkjanoya la chónta kjuachaxin, la ko ntáxrjanhya kíxin tí nto tsíkjokehé sín tí nkehe tsíkjanoya la qantsí chónta kjuachaxin. ²⁰ Náhí. Ntáxrjan kíxin tí nkehe tjanjon tí sín chónhya Dios na mé tjokehé sín tí nchakuen tí jínahya la jehya Dios tjokehé sín tíha. Méxra janhan tjinkakonhya kíxin xikaha chrókjuich'erá jahará chróxráxinkáonrá tí nchakuen tí jínahya. ²¹ Tí its'ini tí nkehe xraxinkakonxínni ijnjé Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrókjóneni tí nkehe. ²² ¿Á jína chrókjuinchekóninkaonni Ìnchéni ní? ¿Á jeheni qantsí chóntani kjuachaxin la ntá jehe ch'án la náhí ní?

Chóntani kaín kjuachaxin kaín xín nkehe na kjónté qantsí tjetoan tsotjuéheni kíchó ni

²³ Siín kjuachaxin ichré nkehe chrókjuich'eni. Kjáñchó jehya kíxin kaín nkehe la jína. Siín kjuachaxin ichré nkehe chrókjuich'eni na kjáñchó kénhya nkehe chrókjuinkitsa chrókónoheni tí nkehe kuènte Dios. ²⁴ Chrókjuéyahará tí

nkehe chrók'uejóxínrá jína jahórá. Náhí. Kjaxin chrókjuéyará tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókuanchankíhyará ninkehó kíxin tí xíkaha ntá ntoáhya chrókjuenkayáxinrá, ²⁶ kíxin kuenté chjasintajni la kaín xín nkehe siín la kuènte Ìnchéni.

²⁷ A ntá jnkojín chojni tinkáchónkihya Ìnchéni chrók'uíyáhará sín kíxin chrókjóntekoará sín la ko tjinkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókuanchankíhyará ninkehó.

²⁸ Kjánchó tí chróntáchro jnkojín sín kíxin tí nto la ó tsíkjokehé sín ijnko nkehe tsíkjangoya, ichro sín, ntá tí xíkaha la chrókjóntehyará jahará, chrókóxakonhanrá kíxin ntoáhya chrókjuenkayáxin tí nkexro chrónka xíkaha. ²⁹ Méxrä ntáxrjan tíhi kíxin tjínkakonhyá kíxin ntoáhya chrókjuenkayáxin chojni ókjé, jehya kíxin ntoáhya chrókjuenkayáxinrá jahará.

Kjánchó isorá tsjanchankínará kíxin nkekuènte chrókóxakonhanrá nkehe chrókjuenkayáxin ókjé chojni kíxin tí kjuachaxin chontará. ³⁰ Tí tjáncháha Dios kjuasáya kíxin tí nkehe inè, ¿ntá nkekuènte kíxin chrókjontana chojni kíxin kuènte kjonè? ³¹ Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoxinrá kíxin Dios kjuínkitsará. ³² Ch'ehyará ninkehó nkehe chrókjuichroixin í so chojni kjónté judío sín la kjónté jehya judío sín la o tí chojni njinkoe Dios. ³³ Janhan mé tjéyá kíxin kaín xín xra tjét'a chrókóxrjhíñ kaín xín chojni, na mé jehya kíxin

tjéyá kíxin janhvàn chrókjuak'é jína. Náhí. Kjaxin tjínk̄avan kíxin chrókuaáxin í so chojni.

11

¹ Chrókjuákoxinrá jahará éxí kjuákoxiān janhan kíxin janhan mé kjuákoxiān éxí kjuákoxin Cristo.

Jína chrók'uejó tí chojni chjin tió tójnkotsé chojni

² Kíchóni, chàna kíxin xráxín xráxinkáonrá tí janhan la ko nchexiteyéhérá tí nkehe kjuákokohárá.

³ A ntá tjínk̄avan kíxin chrókiénxinrá kíxin Cristo t'etueñhen jnkojnko chojni ntoa, la ko kjaxin xikaha jnkojnko chojni ntoa mé t'etueñhen tí ichjién, la ko kjaxin xikaha Dios mé t'etueñhen Cristo. ⁴ A ntá tí jnkojín chojni ntoa xrasixín kachjinke ch'án tí tjenixjehé ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjákoxin ch'án kíxin chóntehya ch'án kjuasáyé tí Ìnchéni t'etueñhen ch'án. ⁵ A ntá ijnko chojni chjin tjóchín kja tjan tí tjenixjehé tjan Dios la o tjóchín kja tjan tí tjechronka tjan iten Dios, mé xikaha tjákoxin tjan kíxin chóntehya tjan kjuasáyé tí xìi tjan. Mé tóyóhé éxí tsíkjín tjan xikaha. ⁶ A ntá tí chojni chjin tjinkakonhya kíxin chrók'uiáxin kja tjan nkehe mé chrókjín tjan. Kjánchó tí chrókósuhé tjan chrókjín tjan, ntá chrók'uiáxin kja tjan tóte tió tójnkotsérá. ⁷ Kíxin tí chojni ntoa chrókjuasinhyá ch'án kachjinke ch'án kíxin jehe ch'án mé éxí retratoé Dios la ko t'inkaséyanxín ch'án tí kjuachaxin kuènte Dios. A ntá tí chojni chjin mé t'inkaséyanxín tjan tí kjuachaxin kuènte tí xìi tjan. ⁸ Kíxin tí chojni ntoa sáoxín k'óna mé

k'uaxrjeníxinha ch'án chojni chjin. Náhí. Tí chojni chjin mé k'uaxrjeníxin tí chojni ntoa. ⁹ Chaxín k'ónahya tí chojni ntoa kíxin jehó tsjak'e ch'án. Náhí. Tí chojni chjin mé k'óna kíxin tsjak'ekotoxín ch'án. ¹⁰ Ntá t'ichjánxín kíxin tí chojni chjin ts'iáxin kja sín tóté chrókjuakoxín sín kíxin t'ítuenhen sín kíxin xíkaha ts'ikon tí sín ángel. ¹¹ Kjáñchó kaín ni tinkáchónkini Cristo t'ichjánxín kíxin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa. ¹² Kíxin chaxín tí chojni chjin na tí chojni ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

¹³ Jahará nkechrorá, ¿á ó nchóxon kíxin ijkno chojni chjin tjóchín kja tjan chrónixjehe tjan Dios? ¹⁴ Jahórá chrókónohará kíxin chrókósuhé tí chojni ntoa chóntha kaxíhi kjínjin. ¹⁵ A ntá tí chojni chjin chóntha kaxíhi kjínjin la mé ntoá tíha kíxin ó kuituénxin tjan kíxin tsochóntha tjan kaxíhi tjan kjínjin kíxin tsotjóchínya kja tjan. ¹⁶ A ntá tí tjen jnkójín nkexro titekakonhya tíha xíkaha ntá chrókónohará kíxin jeheni la ko kaín xín tí sín ninkoe Dios la xíkahó kuènhenni.

*Ntoáhya kjóne sín tí niotja xraxinkakonxín sín
Inchéni*

¹⁷ Méxra tí nkehe tjékjian la mé ijkno nkehe tóxrjínnahya tjejoch'erá. Tió tójkotsérá ntiha la ijkno nkehe jína chrókjuich'erá. A ntá náhí la ijkno nkehe jínahya tjejoch'erá. ¹⁸ Na mé saoxín na mé ntáchro sín kíxin tió tójkotsérá la jnkokqóahya tjenkayáxinrá. Ntáxrjan kíxin ách'e chaxín xíkaha tjejorá. ¹⁹ ¿Xá t'ichjánxín

kixin chrók'uaxrjentará kixin chrókónoexínni kixin nkekro chaxín tinkáchónki Ìnchéni la ko nkekro tí náhí? ²⁰ Méxra tí xíkaha jnkokoáhya tjenkayáxinrá ntá tió tójnkotsérá chrókjónterá niotja la chaxínhyá xraxinkákxonxínrá Ìnchéni tí xíkaha. ²¹ Kixin tió sinterá la senó isorá tjejonté la kjónté naxá t'énxinrá kjinta, la í sorá la tsíkókoanrá. ²² ¿Á chontahyará nchia ntoará? Ntahó chrókjóntexínrá la ko chrók'uíxinrá nkehe. Mé xíkaha chontahyará kjuasáyé tí njinkqe Dios la ko nchesuèhérá tí sín nòa chontahya ninkehó. ¿Nkehe tsontáxrjan? ¿Á tsontáxrjan kixin jína tjejoch'erá? Kjá náhí. Jehya jína tjejoch'erá.

*Jína chróxraxinkakonxínni Ìnchéni
(Mt. 26.26-29; Mr. 14.22-25; Lc. 22.14-20)*

²³ Kixin Ìnchéni mé chjìna ch'án tí nkehe kjuákohará: kixin tí tie tsíkóxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'q ch'án tí niotja ntá ntáchro ch'án kixin: “Tíhi mé ntqna xránjon its'en kixin jína ts'ejóxin tí jahará. Méxra xíkaha sich'erá kixin tsoxraxinkákxonxínrá tí janhan”, ichro ch'án. ²⁵ La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kixin: “Tíhi mé tjakoqxin kixin chaxín tsoxiteyá ijkno nkehe nixin kuènte Dios kixin ts'ítji jnina. Tió its'irá tíhi mé tsoxraxinkákxonxínrá tí janhan”, mé chro ch'án. ²⁶ Kixin tí interá tí niotja la it'irá tí inté to uva mé xíkaha tjejotjákoxinrá kixin xíkaha k'uénxin

Ìnchéni. Mé xíkaha tsjákoxinrá tsjixrakájia yaon tsokjan ch'án.

Ntoá chrókjóneni tí niotja kuènte Ìnchéni

²⁷ A ntá jnkójín nkexro chjini chrókjóné sín tí niotja la ko chrók'ui sín tí inté to uva xraxinkakonxínni Ìnchéni, mé xíkaha chrókjusin sín jie chrókjuicosáyehya sín tí cuerpo la ko tí ijnjé Ìnchéni. ²⁸ Méxra jnkojnkoni chrókjuenkayáxinni senó kixin á chóntahyani jie na ntá chrókjóneni tí niotja la ko chrók'uini tí inté to uva. ²⁹ A ntá tí xíkaha chjini chrókjóneni la ko chjini chrók'uini la chaxínhyá chróxraxinkakonxínni tí cuerpo kuènte Ìnchéni la mé tí xíkaha chrókjuich'eni la chrókjusótexínni tíha. ³⁰ Mé xíkaha itsjérá níhará la ko itsjérá tsankahyará la ko jnkójínrá k'uénrá. ³¹ A ntá tí chrókjuatsoanni nkexrí tjen əsénni jeheni ntá Ìnchéni t'ichjánxienhyá chrókjuinchekjasóteni ch'án. ³² A ntá kjónté chrókjuinchekjasóteni Ìnchéni ntá chrók'uitjani chrókjuinchexiteyéh^{en}i ch'án, ntá chrókjuasótehyani éxí tsjasóte tí í so chojni chjasintajni.

³³ Méxra kíchó ni, tió tójnkotsérá sinterá la chróchonhénrá chrókui tí í so sín ntá chrókjóntekóará sín jnkokoá. ³⁴ A ntá tí nkexro ik'uén kjinta la íchá jína senó chrókjónexín nkehe ntøe ó kixin ntá chrókjuinchekjasótehyará Dios kixin xíkaha ntoáhya tójnkotsérá. A ntá tí í so nkehe la tsjásiyóxian janhan tió tsjasántsjahará.

12

*Nchakuen Dios mé chjéhe kjuachaxin jnkojnko
chojni*

¹ Kíchóni, tjínk̄avan kíxin tsonohará jína kíxin nkexrí siín tí kjuachaxin tjanjon Nchakuen Dios t'áyéhé jnkojnko chojni.

² Jahará ó nohará jína kíxin tió nax̄a kuinkachónkehýará Ínchéni na mé kuinkachréhérá tí nkehe tsíkjanoya nixjahya. ³ Méxr̄a chrókónohará kíxin nijnko nkexro nixjaxin kjuachaxin Nchakuen Dios tsjacha ts'ántaxính̄in Jesúś, la ko nijnko nkexro tsjacha tsontáchro sín kíxin Jesúś mé Ínché sín tí nixjaxinh̄ya sín tí kjuachaxin Nchakuen Dios.

⁴ A ntá nchónhya xr̄a kuènte kjuachaxin Nchakuen Dios siín la kjánchó jnkokoá Nchakuen Dios mé tjetjanjon. ⁵ La ko siín nchónhya nkexrí sich'heni xr̄a Ínchéni, kjánchó Ínchéni la ójnkó nkexro tíha. ⁶ La ko nchónhya nkehe t'axrjexín tí xr̄a ch'e jnkojnko chojni la kjánchó jnkokoá Dios tjetjanjon tí kjuachaxin ch'exínni xr̄a kaín ni. ⁷ Jnkojnko chojni mé kuitonh̄en kíxin chrókjuakoxin kjuachaxin kuènte Nchakuen Dios kíxin xíkaha chrókjuinkitsa kichó. ⁸ Iso chojni mé ts'áyéhé kjuachaxin tsonixja sín kjuaxrexinkaon jína kíxin tjinkitsa Nchakuen Dios, la ko í so chojni ts'áyéhé kjuachaxin tsochrónka ijnko nkehe kuènte Dios noehya tí í so sín kíxin Nchakuen Dios mé tjinkitsa sín tsonixja sín. ⁹ La ko í so chojni mé ts'áyéhé kjuachaxin qantsí tsinkáchónki Dios kíxin Nchakuen Dios mé tjinkitsa. La ko í so chojni mé ts'áyéhé kjuachaxin sinchekitq̄he chojni

jína. ¹⁰ La ko í so chojni mé ts'áyéhé kjuachaxin tsjasin sín kjuaxroan, la ko í so chojni mé ts'áyéhé kjuachaxin kíxin Dios sinchenohe sín ijkno nkehe tsochenka sín tí í so kíchó ni, la ko í so chojni mé ts'áyéhé kjuachaxin tsjatsoanxín á kjuachaxin kuènte Nchäkuen Dios o á kjuachaxin kuènte ijkno nchäkuen jínahya chronkaxín ijkno chojni, la ko í so chojni mé ts'áyéhé kjuachaxin kíxin ijkno nkìva ókjé nàxa k'uitjahya sín tsonixjaxín sín ijkno nkehe kuènte Dios, la ko í so chojni mé ts'áyéhé kjuachaxin tsochronkaxín nkexrí t'axrjexín tí nkehe ókjé nkìva tsíchronka tí í jnko chojni. ¹¹ Kjánchó kaín tíha jnkokoá Nchäkuen Dios mé tjinkitsa, na mé k'uáyéhé jnkojnko chojni jnkojnko kjuachaxin éxí tjinkaon tí Nchäkuen Dios nkerí xra chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxí yóhé ijkno cuerpo chóntha nchónhya parte. A ntá ijkno cuerpo la jnkokoá kjánchó nchónhya parte chóntha. Kjónté nchónhya parte chóntha tí cuerpo la tí cuerpo la ójnkó. Mé xíkaha Ínchéni Cristo la ójnkó tí jehe ch'án. ¹³ Kaínni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ítuenhya, kaín ni na mé jnkokoáxón Nchäkuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéheni tí jnkokoá Nchäkuen Dios.

¹⁴ Kíxin tí cuerpo kuénteni la jehya jnkokoá parte chóntha. Náhí. Itsjé parte chóntha tí cuerpo. ¹⁵ Tí chróntáchro tí toteni kíxin: “Jehya itja tí jeheni na mé jehya jeheni kuènte tí cuerpo”, na mé

chaxínhya tíha kíxin ó jehe cuerpo kuènte. ¹⁶ Kjaxin tí chróntáchro ijnko ntatsjoni kíxin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kíxin ó jehe cuerpo kuènte. ¹⁷ Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni? ¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kíxin jehe ch'án nkexrí tjinkaon ch'án kóxrjínhin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóntha tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kíxin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kíxin: “T'ichjánxiinnahya tí jaha.” ²² Náhí. Tí nkehe kuènte tí cuerpo tónhenni kíxin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kíxin tsonoxínhya. ²⁴ A ntá tí nkehe náxrjón na mé t'ichjánxienhyia ka ts'lítsá. Mé xíkaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kíxin ninkehó xitjahya chróxikayehé tí cuerpo kíxin kaín tí nkehe la jnkokón tjinkitsa kichó. ²⁶ Tió tsíkóníhi ijnko parte kuènte tí cuerpo la kaín tí í so parte la kjaxin tjoté; la ko tió tjkosáyehé sín ijnko parte la kuenté tsochéhe.

27 A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. **28** Méxra Dios kjueyá ch'án chojni sich'ehe ch'án xra kuènte ninko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuíchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin qantsí tjinkitsa kichó, la ko kjaxin kjueyá ch'án í so chojni chjéhe ch'án kjuachaxin ts'etoan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkìva.

29 Kénhyá chojni tsík'óna apóstol, la ko kénhyá chojni chóntha kjuachaxin sinchenohe sín Dios ijnko nkehe tsochrónka sín, la ko kénhyá chojni chóntha kjuachaxin tsjako sín itén Dios, la ko kénhyá chojni chóntha kjuachaxin tsjasin sín kjuaxroan, **30** la ko kénhyá chojni chóntha kjuachaxin sinchekitohe sín chojni jína, la ko kénhyá chojni chóntha kjuachaxin tsonixjaxin sín ijnko nkìva ókjé, la ko kénhyá chojni chóntha kjuachaxin tsochronkaxín sín nkexrí t'axrjexín tí nkehe chrónka tí sín nixjaxin ijnko nkìva ókjé. Chaxín kjá náhí. **31** Méxra tjéyará tí kjuachaxin qantsí jína chrótjáhará Dios. Ntá jie tsjákhárá ijnko ntja qantsí jína chrók'uejorá.

13

Chrótjuèheni kichó ni

¹ Tí chrónixja nkívee chojni ó la ko kjaxin chrónixja éxí nixja tí sín ángel, ntá naxa chrótjuahya kichó ni la ó chónkó tíha la mé éxí chrókóyona chica tsjánka ó la ko éxí ijnko chica platillo nchevékjan sín ó, kixin ninkehó són chontahya. ² La ko tí chrónixja itén Dios, la ko tí chrókianxian kaín nkehe kuénte Dios naxa noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókjuacha chróntátjan ijnko jná sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókjuintakitonhan tí sín nòa kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xikaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsóníkkakuenhyani kichó ni, la ko sinchejína əsénni, la ko tsochjinoxíenhyani, la ko sinchehnkehyani, la ko tsohnkehyani, ⁵ la ko ch'ehyani ninkehó nkehe náxrjónhya, la ko tjeyáhyani nkehe kuénteni ó, la ko tsóníkkakonhyani tjoka, la ko tsochóntahyani kjuánkaon isé, ⁶ la ko kjaxin tsochéhyani tió í jnko chojni tjasin jie. Náhí. Chrókóchéheni tió ijnko nkehe jína sítónen. ⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókóníkkakonhyani.

⁸ Tí tjuèheni kichó ni la jnkochríxín tsjak'e ts'itjáyanhya. A ntá itsi ijnko yaon í t'ichjánxihya tsochrónka chojni itén Dios, la ko tsokohya

kjuachaxin tsonixjaxin chojni ókjé nkìva, la ko tsokohya kjuachaxin tsongohe chojni má. ⁹ Naxaq t'itjáyan tí nkehe chrókónoheni la ko naxaq t'itjáyan tí nkehe chróchronkaxínni. ¹⁰ A ntá tió tsongohe kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió naxaq chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kuijtohaq tí nkehe kuènte chánjan. ¹² Méxra éxí ijkno xrosentaq t'ikonxínyani jína jie, ntá tsi ijkno yaon chr'éxin ntá ts'ikonxínni jína kaín nkehe. Ijie naxaq t'itjáyan tí nkehe chrókónòná; ntá tsi ijkno yaon tsónóna jína kaín xín nkehe éxí xíkaha kjaxin Dios chóxin ch'án tí janhan. ¹³ Méxra, iní nkehe tjejó jnkochríxín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe siín, la kjánchó qantsí má t'ichjánxin tsotjuèheni kichó ni.

14

Tí nixjaxin chojni ókjé nkìva

¹ Chrókoxakonhanrá kíxin chrótjuèhérá kíchuárá la ko kjaxin chrókjuyárá kíxin Nchäkuén Dios chrótjáhará kjuachaxin. Kjánchó qantsí chrótjinkáonrá tí kjuachaxin tsochronkará ijkno nkehe kuènte Dios. ² Méxra, tí nkexro nixjaxin ijkno nkìva ókjé mé nixjehe sín Dios ó la ntá chojni la náhí, kíxin kohya ninkexró tienxín tí nkehe nixja sín la mé nchäkuén sín ó mé chronkaxín sín ijkno nkehe kuènte Dios noehya tí í so sín. ³ A ntá tí nkexro chronkaxín ijkno nkìva tienxín tí í so sín ijkno nkehe kuènte Dios mé nixjehe chojni ntá

xíkaha tjinkitsa tí í so sín kíxin ąntsí chrók'uitja sín nkehe kuènte Dios la ko chrókóchéhé sín. ⁴ A ntá tí nkexro nixjaxin ijkno nkiva ókjé la mé tjinkitsa jehó ch'án ąntsí tsönohe tí kjuachaxin kuènte Dios. A ntá tí nkexro chronkaxín ijkno nkehe kjuínchenohe Dios mé tsjinkitsa tí sín kuènte níjko kíxin ąntsí chrók'uitja sín nkehe kuènte Dios.

⁵ Tjinkaván kíxin kaín rá chróchontará kjuachaxin chrónixjaxinxnrá ijkno nkiva ókjé. Kjánchó ąntsí tjetoan chróchontará kjuachaxin chróchrónkará ijkno nkehe kjuínchenohará Dios. A ntá kánhyó tjetoan chrónixjaxinxnrá ókjé nkiva tí noahyará tsöchrónkaxinxnrá nkexrí t'axrjexín tí nkehe chróchrónkará kíxin chrókuinhin kaín tí sín tinkáchónki Ínchéni kíxin ąntsí chrók'uitja sín nkehe kuènte Dios. ⁶ A ntá kichó ni, tí chrókjuasántsjahará chrónixjaáxinrá ijkno nkiva ókjé la ó chónkó tíha. Íchá jína chrónixjaáxinrá ijkno nkiva tiénxinrá chróxrjankaxián ijkno nkehe kjuínchenòná Dios la chróxrjankaxián ijkno nkehe kuènte Dios naxa noahyará, la chróxrjankaxián ijkno nkehe tjinkaon Dios chrókónohará, la chrókjuákoáxinrá ókjé nkehe níxin.

⁷ Kíxin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsoanni nkehe tí ntáchro tí són a. ⁸ La ko éxi yóhe tí siín guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjónko kichó sín. ⁹ Kjaxin xíkaha tí jahará tí nixjahyará ijkno tan tienxín sín, ¿ntá nkexrí chrókónohe sín nkehe tí ntáchrórá? Mé

xíkaha tjejonixjará éxí chjéhe xrínto ó. ¹⁰ Chaxín siín itsjé nkìva chjasintajni la ko kaín nkìva la siín chojni tienxín sín. ¹¹ Kjánchó tí chrókiānxínhya janhan tí nkehe tsontáchro ijnko nkexro, ntá tí nkexro a ts'ikon tí janhan éxí ijnko nkexro tsíkjixin ókjé la ko kjaxin janhan ts'íkuān tí jehe ch'án éxí ijnko nkexro tsíkjixin ókjé. ¹² Méxra jahará imá tjinkáonrá chrók'uayéhérá ijnko xra kuènte Nchäkuen Dios, ntá chrókójína chrókjuéyárá tí xra chrókjuinkitsa tí í so sín kuènte níjko kíxin ąntsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkìva ókjé la chrókjuanchehe Dios kíxin chrókjuinkitsa chróchronkaxín ch'án nkexrí t'axrjexín tí tan a. ¹⁴ Kíxin tí tsonixjaxian Dios ijnko nkìva ókjé, ntá tí nchäkuenná ó mé tjenixjéhe Dios, la ntá tí kjuaxrexinkaon kuèntana la ókjé tjen. ¹⁵ A ntá tí xíkaha, ¿nkehe chrókjuít'a? Íchá jína chrónixjaxian Dios tí nchäkuenná la chrókiānxian janhan, la ko tió chrótsje janhan himno la chrótsjexian nchäkuenná la ko chrókiānxian janhan. ¹⁶ Kíxin tí tsochjeéxinrá kjuasáya Dios nchäkuanrá ó ntá tjejótinhin í so chojni, ¿ntá nkexrí kíxin tí sín naxa kienxínhya sín tí nkehe nixjehérá Dios chróntáchro sín "Amén, ó nchoxon"? ¹⁷ Kjónté imá náxrjón tí chrókjuanchehérrá Dios kjuasáya la ntá chrókienxínhya tí sín tjejótinhin, ntá chrokjuinkitsahya kíxin chrók'uitja sín nkehe kuènte Dios. ¹⁸ Tjáncháhá Dios kjuasáya kíxin ąntsí chonta janhan kjuachaxin tsonixjaxian ókjé nkìva, la ntá jahará la kánhyó nixjará xíkaha. ¹⁹ Kjánchó tió tójnkotsé chojni kíchó ni la mé

ntáxrjan kixin antsí tjinkaván chrónixja janhan kjónté in'ó palabra ó tienxín sín kixin xikaha chrókjuákuaxian sín, la ntá kánhyó chrókójina kjónté ite mil palabra chrónixjaxian ijnko nkiva ókjé tienxínhyá chojni.

²⁰ Kichóni, chrókjuenkayáxinhyará éxí chánjan. Kjánchó chrók'uejorá éxí chánjan naxaq noehya nkehe jinahya. A ntá chrókjuenkayáxinrá éxí chojni nteto. ²¹ Tí xroon tsíkjín sín ósé nkexrí k'uetoan Dios mé ntáchro kixin: "Janhan tsoníxjaxian ókjé nkiva la ko itén chojni ókjé kixin tsinhin tí nación Israel na kjónté tsitekakonhya sín, xikaha ichro Ìnchéni."* ²² A ntá tí kjuachaxin tsoníxjaxin chojni ókjé nkiva mé xránjon kixin chrókjuákoxin chojni chrókuinhin tí sín tinkáchónkihyá Ìnchéni, jehya kixin t'ichjánxiñin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuákoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihyá Ìnchéni. ²³ A ntá tió tójkotsérá kaín rá tinkachónkirá Ìnchéni, a ntá kaín rá chrónixjaxinrá ókjé nkiva, ntá tí chrók'uixenhen nchia ijnko chojni naxaq kuènhyá sín xikaha, o chrók'uixenhen nchia ijnko chojni naxaq tinkachónkihyá Ìnchéni ntá chrókuinhin sín xikaha la kjá tsontáchro sín kixin ó k'uíxikjánrá. ²⁴ Kjánchó tí chróchrónkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkachónkihyá Ìnchéni, o

* ^{14:21} Isaías 28.11-12

chrók'ui xenhen ijnko chojni naxá tienhyé, ntá chrókuinhin sín nkehe tjejonixjará kaín rá ntá chróxraxinkaon sín tí jiē chóntha sín ntá chrókuítuhe sín kaín jiē chóntha sín. ²⁵ Ntá ts_onoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kíxin chaxín tjejókoará Dios.

Ntoá chrókjuich'eni kaín xín nkehe tió tójnkotséni

²⁶ A ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkiva ókjé, la ko isorá chróchronkaxínrá nkexrí t'axrjexín tí nkehe nixjaxin tí í so sín ókjé nkiva. Kjánchó kaín tíha ts_onhen kíxin tí sín kuènte n_inko chrók'uitja sín nkehe kuènte Dios. ²⁷ A ntá tí chrónixjaxin sín ijnko nkiva ókjé na mé yaá o iyá chojni chrónixja sín la ko chrók'uíxinkí chojni tsonixja, la ko t'ichjánx_in kíxin jnkojín nkexro nohe tsochronkaxín nkexrí t'axrjexín tí nkehe nixja sín. ²⁸ A ntá tí kohya ninkexro tí n_inko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjaxinhyá sín ókjé nkiva tí tjejótójnkotsé sín, na mé chrónixjehé sín asén sín ó la ko chrónixjehé sín Dios ó. ²⁹ Tjánjonrá kjuachaxin kíxin tsonixja yaá o yá chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxón tí nkehe kuínhin sín. ³⁰ A ntá tí xrínahya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro

senó kjuankíxin chrónka nkehe la chróchónhen ch'án chrónixjahya ch'án. ³¹ Ó nchoxon jnkojnkorá chróchronkará nkehe tjáhará Dios kíxin xíkaha kaín rá chrók'uitjárá la ko chrókócháhará. ³² A ntá tí nkexro k'uayéhé kjuachaxin tsochronka nkehe kjuínchenohe Dios kjäxin t'ichjánxín chróchónhen tsochronkaxín í jnko nkexro. ³³ Kíxin Dios tjanjon tí kjuaxróxin, a ntá tjinkakonhya ch'án kíxin yóxinhya chrók'uejóni.

Tió tójnkotsé chojni kíchó ni tinkáchónki Închéni ³⁴ chrónixjahya tí chojni chjin jnk̄osiné servicio. Kohya kjuachaxin xíkaha, na mé chrókjuinchexiteyéhé sín tí sín ntoa éxi t'etoan tí ley kuénte Dios. ³⁵ Tí tjinkaon sín tsongohe sín nkehe na mé chrókjuanchankíhi sín xíi sín tió tiji sín ntøe sín. Náxrjónhya chrónixja ijkno chojni chjin nkehe jnk̄osiné servicio.

³⁶ Chrókónohará kíxin tí itén Dios xrankíxixínya tí tjejorá la ko jehya jahórá k'uayéhérá tíha. ³⁷ A ntá tí tjen jnkojín nkexro tjenkayáxin kíxin nixja itén Dios o tjenkayáxin kíxin tí Nchäkuen Dios tjinkitsa tí jehe ch'án ntá chrókónohe ch'án kíxin tí nkehe tjékjian mé ijkno nkehe tsík'etoan Închéni. ³⁸ A ntá tí nkexro titekakonhya tíhi na ntá jahará chrókuitekákuényará ch'án kjäxin.

³⁹ Méxra kíchó ni, chrókjuéyará kíxin chrók'uayéhérá kjuachaxin chróchronkará nkehe kjuínchenohará Dios la ko chrókuitohérá tsonixjaxín chojni ókjé nkiva. ⁴⁰ Kjánchó kaín xín nkehe la jnkojína la ko kjuasáya chrókónhen.

Tsíxechón Cristo

¹ A ntá jie kíchó ni, tjínkávan chróxraxinkáonrá nkehe tí tan kuaáxinrá kjuákohárá. Tíha mé kuítekáonrá, la mé tíha mé tjejóxinrá jína. ² Kjaxin tí nkehe kjuákohárá mé kuaáxinrá, tí tjtóéhyará tí nkehe kjuákohárá; tí la náhí la chónkó kuinkachónkirá tí nkehe kjuàkua.

³ Sæoxín, kjuákohárá tí nkehe k'uayáha kíxin Cristo k'uenyákonhen ijíéni, na mé xikaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón ch'án tí níxin yaon éxí ntáchro tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxín ínaá tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxín chjina quinientos chojni kíchó ni jnkokoá k'uéjó sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín. ⁷ Chr'éxín k'uíkon ch'ín Jacobo tí jehe ch'án, la ko k'uíkon kaín tí í so sín apóstol ínaá.

⁸ A ntá kjuixixín janhan k'uíkuan Ínchéni éxí ijkno xjan naxa xetjahya yaon chrókokjíhi. ⁹ Kjánchó janhan kánhyó tjetoan la mé tóyóqehya tí í so sín tsíkjeyá Ínchéni la ko tósuàna chrók'óna ijkno nkexro ch'ehe xra Ínchéni kíxin janhan mé k'uénínkákonhan tí sín njinkoe Dios. ¹⁰ Kjónté jínahya kjuít'a la kjuasáyé Dios la ko kjuachaxin kuénte ch'án mé kjuítóxihin tí kjuenkayáxian, na mé chónkóhya kuíkonóana ch'án, kíxin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhí. Dios kjuínkitsana ch'án kjuít'a xra. ¹¹ Kjánchó tjetuanhya á janhan o á jehe

sín kjuako sín, kíxin xíkaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kíxin Cristo la xechón, ¿ntá nkekuènte ntáchrórá jnkójínrá kíxin tsoxechónhya chojni tsík'en? ¹³ Tí chrókóchaxín tí nkehe ntáchrórá kíxin tsoxechónhya chojni tsík'en, ntá kjaxin chróxechónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. ¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuénté Dios, kíxin ó chrónkani kíxin Dios kjuínchexechón Cristo. A ntá tí chrókóchaxínhya kíxin chróxechón Cristo, ntá kjaxin chrókóchaxínhya kíxin chróxechón chojni tsík'en ¹⁶ kíxin tí chróxechónhya tí chojni tsík'en, ntá kjaxin Cristo chróxechónhya ch'án. ¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kíxin naxá chrókjuìlinha tí ijiárá. ¹⁸ La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín. ¹⁹ Méxrä tí chrókuinkáchónkini Cristo kíxin chrókjuinkitsa ch'án tí jeheni chjasintajni ntihyó, ntá kohya chojni chrókoyóhé tí jeheni, imá chrókónòéni chrók'uejóni kaín ni.

²⁰ Kjánchó náhí, la chaxín ó xechón Cristo. Jehe ch'án éxí tí nkehe tsík'óna saoxín kíxin jehe ch'án saoxín xechón ch'án. ²¹ Méxrä jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xíkaha tsoxechón kaín chojni tsík'en. ²² Kíxin tí jie kjuasin ch'ín Adán

ntá kaín xín chojni sít'enxín sín. A ntá Cristo la kaín ni tsochóntaxínni kjuachón. ²³ Jnkojnconi éxi tsöñhenni tocar, na mé saoxín xechón Cristo, a ntá chr'éxin tió tsokjan ch'án ntá tsozechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyan Cristo kaín xín nkehe t'etoan la ko kaín xín kjuachaxin ókjé, ntá tsjanjon ch'án tí xra t'etoan kixin ts'ayéhé It'é ch'án Dios. ²⁵ Na mé t'ichjánxín ts'etoan Cristo tsjixrakájia tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyan la mé tí kjuach'én. ²⁷ A ntá Dios kjuanjon kjuachaxin kixin kaín nkehe siín mé chrók'uëtuënenhen Cristo.* Kjánchó tió xíkaha ntáchro tí xroon itén Dios tsíkjín sín ósé kixin kaín xín nkehe mé ts'etuenhen ch'án, ntá ó noheni jína kixin jehya kixin Ðios la chrók'uítuënenhen ch'án ínaá. Náhí. Jehe ch'án mé chjéhe Xjeen ch'án kaín kjuachaxin ts'etuenhen ch'án kaín xín nkehe. ²⁸ A ntá tió tsjixin tsjacha Cristo ts'etuenhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhé ch'án It'é ch'án Dios kixin ntá Dios mé ts'etuenhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xíkaha ch'e sín tí titekakonhyá sín kixin tí sín tsík'en tsozechón sín ínaá?

³⁰ A ntá tí xíkaha, ¿nkekuènte kixin kaín yaon kjuaxróxinhya tjejóni nínkakonhenni chojni? ³¹ A ntá kíchó ni, kaín yaon siín kjuachrakon chrók'uèn janhan. Chaxín tíhi, kjánchó chàna kixin jahará kjaxinrá tinkachónkirá Înhéni Jesucristo. ³² Kjónté kónínkakonna chojni chjasin

* **15:27** Salmo 8.6

Éfeso éxí iko jiehe la kjónté kjuak'é ntihá, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xíkaha la ó nchoxon tí nkehe ntáchro tí sín titekakonhyá Ìnchéni kíxin chrókjóne sín la ko chrók'ui sín kíxin ijie la ɔ ntóye chrók'uen sín.

³³ Chrókuítqéhyará chrokjuit'ayahará sín. Éxí ntáchro sín kíxin: “Tí chrók'uejókotoxiñni chojni jínahya ntá chrók'uitjáyan tí nkehe jína tjenkayáxinni.” ³⁴ Chrókjanrá ntia jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kíxin chrókósuàhará.

Nkexrí tsoxechón tí sín tsík'en

³⁵ Kjá jnkojínrá tsjanchankinára kíxin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?” ³⁶ Lontirá tjanchankinára xíkaha. Tí noatje t'enkani nonte t'ichjánxín its'en ts'itjáyan kíxin tsjak'echón tí nkehe ts'ayan. ³⁷ Tí nkehe t'enkani la jehya tí ka a. Náhí. Tí nkehe t'enkani la noatrico ɔ í jnko tje. ³⁸ Kjánchó Dios kjuanjon kjuachaxin kíxin jnkojnkó nta ts'óna éxí tjinkaon ch'án, la ko jnkojnkó nta tsochónta tje kuénte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuénte chojni, la ko í jnko la cuerpo kuénte ko, la ko í jnko la cuerpo kuénte koxroxé, la ko í jnko la cuerpo kuénte koche. ⁴⁰ Na mé kjaxin xíkaha siín cuerpo kuénte tí sín ángel tjejó nkaya nkajní la ko siín cuerpo kuénte chojni tjejó chjasintajni. A ntá tí cuerpo kuénte tí sín ángel la náxrjón tsjehe la ko kjaxin tí cuerpo kuénte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé

nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xíkaha tsónhen tí chojni tsík'en tsozechón sín. Tí nkehe tsoxravá la mé ijkno nkehe tsotje, a ntá tí nkehe tsozechón la mé ijkno nkehe ts'itjáyanhya. ⁴³ Tí nkehe tsoxravá la ijkno nkehe náxrjónhya tíha, la ntá tí nkehe tsozechón la ijkno nkehe imá náxrjón. Tí nkehe tsoxravá la ijkno nkehe chóntahya kjuachaxin, la ntá tí nkehe tsozechón la ijkno nkehe tsochónta kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsozechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochónani cuerpo antsí tsochónta kjuachaxin kuènte Nchakuen Dios.

⁴⁵ A ntá éxi ntáchro tí xroon itén Dios kixin: “Tí chojni ntoa k'óna sàoxín mé ch'ín Adán tíha mé k'uáyéhé ch'án kjuachón ó.”† A ntá tí ó kjuixixín ikui í jnko ch'ín éxi yóhé Adán, kjánchó jehe ch'án mé chóntha ch'án nchakuen tjanjon kjuachón. ⁴⁶ Kjánchó jehya sàoxín k'óna tí cuerpo antsí chóntha kjuachaxin kuènte Nchakuen Dios. Náhí. Sàoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóntha kjuachaxin kuènte Nchakuen Dios. ⁴⁷ Tí nkexro k'óna sàoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án. ⁴⁸ Tí cuerpo siín chjasintajni mé yóhé tí cuerpo k'uéchóntha tí nkexro tsík'óna nche. A

† 15:45 Génesis 2.7

ntá tí cuerpo siín nkaya nkajní mé yóhe tí cuerpo chóntha tí nkexro kuixin nkaya nkajní. ⁴⁹ Éxí senó tóyóhení tí nkexro k'óna nche, ntá xikaha chr'éxin tsøyóhení tí nkexro kuixin nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chántani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjejehya. ⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chántani. ⁵² A ntá xrínahya titaya tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsontáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chántani. ⁵³ A ntá tí cuerpo chántani la tsjeje, ntá t'ichjánxín ts'inkáya nkehe chónhya tsjeje. La ko tí cuerpo chántani la ts'en ntá t'ichjánxín ts'inkáya nkehe chónhya ts'en. ⁵⁴ A ntá tió tí cuerpo chántani la tsjeje, na mé t'ichjánxín ts'inkáya tí nkehe chónhya tsjeje, la ko tió tí cuerpo chántani la ts'en, na mé t'ichjánxín ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”[‡] ⁵⁵ “Jaha kjuach'én, ¿kjá tí kjuachaxin kuénta kixin chrókjuacha jaha? Jaha kjuach'én, ¿kjá tí kjuachaxin kuénta kixin chrók'oyánni?”[§] ⁵⁶ Tí jie tjasinni mé kuixin tí ts'enni. A ntá tí ley k'uetoan óse qantsí k'uíxixín jie. ⁵⁷ A ntá tjancheheni Dios

[‡] **15:54** Isaías 25.8 [§] **15:55** Oseas 13.14

kjuasáya kíxin ichr'án ch'án Ìnchéni Jesucristo kíxin táha mé tsaáxinni.

⁵⁸ A ntá jahará kíchó ni, imá tjuahará. Chrókuitoéhyará tinkachónkirá Ìnchéni. Jnkochríxín chrókjuich'ehérá Ìnchéni xra antsí jína kíxin ó nohará jahará kíxin tí xra ch'heni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjénajínrá kíxin tsjínkitsará tí sín kíchó ni tinkáchónki Ìnchéni na mé chrókjuich'erá éxi kuétuanhán tí sín ninko estado Galacia. ² Jnkojnkdomingo jnkojnkcorá chrókuakitsjenteherá nkerí síká chichaon kjuachará tí semana kjuich'erá xra kíxin t'ichjánxínhya chrókjuasánquia janhan ntá chrókjuénajínrá chichaon. ³ A ntá tió tsjasán janhan tsétuanhán tí sín tsjéyárá kíxin sátsji sín chjasin Jerusalén, na ntá tsokjian xroon tsjíkoxín sín tí chichaon tsíkjénajínrá tsjikaán tí sín kíchó ni ntiha. ⁴ A ntá tí chrókójína kjaxin janhan sáchrókuiyá, a ntá sáchrókjuíkian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxín ts'atsínka janhan estado Macedonia ntá chr'éxín tsjasán ntiha chjasin Corinto. ⁶ Ách'e ntahó chrókuitona chrók'uatsínkajia nchákuén kin. A ntá jahará chrókjuínkitsará tí janhan tió sátsjia ókjé chr'éxín. ⁷ Méxra tjínkakonhya chrók'uatsíndoá chrótsjahárá ó. Náhí. Tjínkaván

chrókuitona iso yaon tí tjejorá ntiha tí Închéni chrókjuanjon kjuachaxin.⁸ Kjánchó tsitona chjasin Éfeso tsjixrakájia yaon Pentecostés,⁹ kíxin ntihi əntsí chonta kjuachaxin chrókjuit'a xra kuènte Închéni la ko jína chrókónhen tí xra kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la antsí jína chrónixjehérá ch'án kíxin kjuaxróxin chrók'uejokoará ch'án kíxin jehe ch'án kjaxin ch'ehe Inchéni xra éxí janhan. ¹¹ Kaín tí jahará chróchonteherá ch'án kjuasáya. Tjínkitsará ch'án kíxin jína itsi ch'án ntihi tsitsjehe ch'án tí janhan kíxin tjéchonhān chrókui ch'án la ko tí í so sín kichóni.

12 A ntá tí kichó ni Apolos la imá xrjanóah̄ ch'án kíxin kjaxin chrókjuijiko ch'án tí í so kichó ni, kjánchó tjinkakonhya ch'án jie. Chr'éx̄in tsjiji ch'án tió ts'íxranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuítgoéhyará tí tinkelkachónkirá Ìnchéni. ¹⁴ Kaín nkehe chrókjuich'erá la koí chrótjuèhérá kíchuárá.

¹⁵ Na ntá kíchó ni, ó nohará kíxin tí sín kjéhya ch'ín Estéfanas səoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjinkitsa sín tí sín kíchó ni tinkáchónki Închéni. ¹⁶ Tjinkaván kíxin chrókjuiñchexiteyéhérá tí sín tjinkitsa éxí tí jehe sín la ko kaín tí sín ch'e xra. ¹⁷ Chàna kíxin ó kui ch'ín Estéfanas la ko ch'ín Fortunato la ko ch'ín Acaico, kíxin jahará kjónté tjejohyará. ¹⁸ A ntá jehe sín kjuínchechéhe

sín əsenná éxí kjuínchecháhará sín. Chróchontehérá kjuasáyé chojni xíkaha.

¹⁹ Tí sín tójnkotsé estado Asia xraxinkaon sín tí jahará. Kjäxin ch'ín Aquila la ko tjan Priscila la ko tí sín tójnkotsé ntœ sín ima xraxinkaon sín tí jahará kixin tinkachónkirá Ìnchéni. ²⁰ Kaín tí sín kichó ni ntihí xraxinkaon sín tí jahará. Nixjehérá kíchuárá kaín rá tséhérá tja kíchuárá jnkojína.

²¹ Janhan Pablo xráxinkaván tí jahará ikjian xroon chr'anhnárá la tjaná kjinxiān tí letra i.

²² Tí nkexro tjuèhya Ìnchéni Jesucristo la tsjasóte. A ntá jehení, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí Nuevo Testamento cuènte Inchéni Jesucristo C'óna Nquìva New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
b9b09122-b3f6-59f0-9594-749907b32b5b